

PERUTUSAN
YAB DATO' SERI ABDULLAH BIN HAJI AHMAD BADAWI
SEMPENA SAMBUTAN HARI WESAK 2005,
22 MEI 2005.

Di Malaysia, kita meraikan kepelbagaian budaya dan agama. Malah kepelbagaian ini telah menjadikan Malaysia sebagai sebuah negara contoh kerana rakyatnya yang berbilang bangsa dan agama dapat hidup bersama dengan harmoni dan sejahtera.

Toleransi, persefahaman dan sikap saling menghormati telah menjadi asas kepada perpaduan Rakyat Malaysia. Semangat seumpama ini perlu diperkembang dan diperkukuhkan, khususnya di kalangan generasi muda, supaya kekuatan dan keunikan ini terus dihayati bagi membina Malaysia sebagai sebuah negara yang teguh, aman dan makmur.

Saya telah meletakkan pembangunan modal insan sebagai satu agenda penting negara dalam usaha kita mencapai Wawasan 2020. Perjalanan menghalu mercu kejayaan amat mencabar dan memerlukan warganegara yang berakhlak, jujur, berilmu, berdaya saing dan mencintai keamanan. Saya yakin, kejayaan akan menjadi milik kita sekiranya semua Rakyat Malaysia dapat menghayati dan mengamalkan nilai-nilai murni yang universal.

Justeru, kerajaan akan terus menerapkan nilai-nilai murni dalam pentadbiran negara dan pelaksanaan program-program yang dirancang. Dalam era globalisasi yang penuh mencabar ini, kita perlu bertindak pantas dan tegas untuk mencapai kejayaan. Namun pada masa yang sama, kita perlu memastikan kemajuan yang kita capai dapat dinikmati oleh semua rakyat. Dengan berpandukan ajaran agama yang kita anuti, kita dapat memastikan negara ini terus ditadbir secara beramanah, adil dan saksama.

Sempena hari yang mulia ini, saya ingin menyeru semua Rakyat Malaysia, tanpa mengira bangsa dan agama, untuk menghayati nilai-nilai murni dan prinsip-prinsip luhur yang kita dokong berdasarkan ajaran agama yang kita anuti dan meningkatkan lagi persefahaman dan kerjasama erat di kalangan kita. Perpaduan adalah kekuatan kita dan perpaduan itu dapat memastikan kejayaan itu adalah milik kita bersama.

Selamat Menyambut Hari Wesak untuk semua penganut Agama Budha dan seluruh Rakyat Malaysia.